

四庫全書

史部

欽定四庫全書

史部  
通典 御製序 目錄  
卷二

詳校官侍郎

臣李封

編修

臣程嘉謨覆勘

覆校官助教

臣吳省蘭

校對官中書

臣田尹衡

謄錄舉人

臣劉圖南

欽定四庫全書

御製重刻通典序

稽古帝王治天下之大經大法以及累朝名物制度因革損益之詳紛綸浩博散見典籍未有統貫唐宰相杜佑於為淮南節度書記時始出己意探討類次勒成一書名曰通典為類八為書二百卷自唐肅代間上溯唐虞雖亦稍据劉秩政典及開元新禮諸書要其網羅百代兼總而條貫之斯已勤矣厥後鄭樵廣之作通志馬

端臨續之作通考三書並行於世朕以其歷年久遠頗有殘缺特命重為校正刊刻以廣其傳通典實先告竣朕惟三書各有意義鄭樵主於考訂故旁及細微馬端臨意在精詳故間出論斷此書則佑自言徵於人事將施有政故簡而有要核而不文觀其分門起例由食貨以訖邊防先養而後教先禮而後刑設官以治民安內以馭外本末次第具有條理亦恢恢乎經國之良模矣書曰學於古訓乃有獲為國家者立綱陳紀斟酌古今

將期與治同道而不泥其迹則是書實考鏡所必資豈以供博覽而已哉爰揭之以告讀是書者

乾隆丁卯冬十二月



乾隆十二年六月十一日內閣奉

上諭汲古者並稱三通該學博聞之士所必資也舊刻  
謫缺漫漶且流布漸少學者閔焉今載籍既大備矣  
十三經二十二史工具告藏其以內府所藏通典通  
志文獻通考善本命經史館翰林等詳校而付之刷  
氏一仿新刻經史成式以廣冊府之儲欽此

全分記

--	--	--	--	--	--	--	--



奉

旨開列校刻通典諸臣職名

監理

和

碩

和

親

王

臣

弘

晝

武英殿總裁

吏

部

右

侍

郎

臣

德

齡

兵

部

左

侍

郎

臣

王

會

汾

國

子

監

祭

酒

臣

陸

宗

楷

提調

署 日講官起居注翰林院侍讀學士臣林蒲封

原任詹事府詹事兼翰林院侍讀學士加七品銜臣陳 浩

校對

日講官起居注翰林院侍讀學士臣齊召南

左 春 坊 左 諭 德臣羅源漢

日講官起居注翰林院編修臣陳大睞

翰林院編修臣陸樹本

翰林院編修臣葉酉

翰林院編修臣程景伊

翰林院編修臣儲麟趾

翰林院編修臣丘柱

翰林院檢討臣程恂

翰林院檢討臣阮學浩

翰林院檢討臣萬松齡

翰林院庶吉士臣史貽謨

校錄

舉

人臣劉湘

貢

生臣潘輝

貢

生臣謝霖

貢

生臣劉岱

貢

生臣杜桂

貢

生臣申居鄖

貢

生臣楊志梁

貢

生臣李泓

貢

生臣盧殿人

武英殿監造

內務府南苑郎中兼佐領加七級紀錄二十次臣雅爾岱

內務府錢糧衙門郎中兼佐領加六級紀錄十六次臣永保

內務府錢糧衙門員外郎兼佐領加一級紀錄四次臣永忠

內務府廣儲司員外郎臣永泰

內務府廣儲司司庫加一級紀錄五次臣三格

監

造

加

一

級

臣李

保

監

造

加

三

級

臣姚

文彬

庫

掌

臣虎

什泰

庫

掌

臣高

永仁

欽定四庫全書

史部十三

通典

政書類一 通制之屬

提要

臣等謹案通典二百卷唐杜佑撰佑字君卿京兆萬年人以蔭補濟南叅軍事厯官至檢校司徒同中書門下平章事守太保致仕謚安簡事蹟具唐書本傳先是劉秩倣周官之法撫拾百家分門詮次作政典三十五卷佑

以為未備因廣其所闕參益新禮勒為此書  
凡分八門曰食貨曰選舉曰職官曰禮曰樂  
曰兵刑曰州郡曰邊防每門又各分子目自  
序謂既富而教故先食貨行教化在設官故  
次職官任官在於審材故次選舉人才得而  
治以理乃興禮樂故次禮次樂教化隳則用  
刑罰故次兵次刑設州郡分領故次州郡而  
終之以邊防所載上溯黃虞訖於唐之天寶



肅代以後間有沿革亦附載注中其中如食  
貨門之賦稅載周官貢賦而太宰所掌九貢  
之法失載載北齊租調之法河清三年令民  
十八受田輸租調而露田之數失載錢幣不  
載陳永定元年制四柱錢法權酤不載後周  
權酒坊法選舉門不載齊明帝時制士人品  
第有九品之科小人之官復有五等法考績  
不載宋齊間治民之官以三年六年為小滿

遷換法職官門如周禮地官有舍人上士二人掌宮中之政乃云中書舍人魏置又隋書大業時改內史監為內書監乃僅云改內史侍郎為內書侍郎又集賢殿書院載梁有文德殿藏書不知宋已有聰明觀藏書之所似此之類未免間有挂漏兵門所列諸子目如分引退取之引退佯敗取之為二門分出其不意擊其不備攻其不進為三門未免稍涉

繁冗而火獸火鳥之類尤近於戲劇州郡門  
分九州以敘沿革而信都郡冀州當屬充而  
誤屬冀又極詆水經及酈道元水經注為僻  
書詭誕不經未免過當邊防門所載多數萬  
里外重譯乃通之國亦有僅得其名不通朝  
貢者既不臨邊亦無事於防題曰邊防名實  
亦舛然其博取五經羣史及漢魏六朝人文  
集奏疏之有裨得失者每事以類相從凡歷

代沿革悉為記載詳而不煩簡而有要元元  
本本皆為有用之實學非徒資記問者可比  
考唐以前之掌故者茲編其淵海矣至其各  
門徵引尚書周書諸條多存舊詁如食貨門  
引尚書下土墳壚注謂壚疎也與孔疎所引  
說文黑剛土也互異又瑤琨篠簜注篠竹箭  
簜大竹亦傳疏所未備職官門引周官太宰  
之屬有司會逆羣吏之治而聽其會計注云

逆謂受也受而鈎考之可知得失多少較實  
公彥疏頗為明晰似此之類尤頗有補於經  
訓宋鄭樵作通志與馬端臨作文獻通考悉  
以是書為藍本然鄭多泛雜無歸馬或詳畧  
失當均不及是書之精核也乾隆四十一年  
五月恭校上

總纂官

臣紀昀

陸錫熊臣孫士毅

總校官

臣

陸費墀

欽定四庫全書

卷

雙  
安

通典原序

唐 左 補 闕 李 翰 撰

儒家者流博而寡要勞而少功何哉其患在於習之  
精知之不明入而不得其門行而不由其道何以徵之  
夫五經羣史之書大不過本天地設君臣明十倫五教  
之義陳政刑賞罰之柄述禮樂制度之統究治亂興亡  
之由立邦之道盡於此矣非此典者謂之無益世教則  
聖人不書學者不覽懼冗煩而無所從也先師宣尼祖

述堯舜憲章文武七十子之徒宣明大義三代之道百世可師而諸子云云猥復制作由其門則其教已備反其道則其人可誅而學者以多閱為廣見以異端為博聞是非紛然瀕洞茫昧而無條貫或舉其中而不知其本原其始而不要其終高談有餘待問則泥雖驅馳百家日誦萬字學彌廣而志彌惑聞愈多而識愈疑此所以勤苦而難成殆非君子進德修業之意也今通典之作昭昭乎其警學者之羣迷歟以為君子致用在乎經



邦經邦在乎立事立事在乎師古師古在乎隨時必參  
古今之宜窮終始之要始可以度其古終可以行於今  
問而辨之端如貫珠舉而行之審如中鵠夫然故施於  
文學可為通儒施於政事可建皇極故採五經羣史上  
自黃帝至於有唐天寶之末每事以類相從舉其始終  
歷代沿革廢置及當時羣士論議得失靡不條載附之  
於事如人支脉散綴於體凡有八門號曰通典非聖人  
之書垂聖人微旨不取焉惡煩雜也事非經國禮法程

制亦所不錄棄無益也若使學者得而觀之不出戶知天下未從政達人情罕更事知時變為功易而速為學精而要其道直而不徑其文甚詳而不煩推而通放而準語備而理盡例明而事中舉而措之如指諸掌不假從師聚學而區以別矣非聰明獨見之士孰能修之淮南元戎之佐曰尚書主客郎京兆杜公君卿雅有遠度志於邦典篤學好古生而知之以大歷之始實纂斯典累年而成杜公亦自為序引各冠篇首或前史有闕申

高見發明以示勸戒用存景行近代學士多有撰集其  
最著者御覽藝文玉燭之類網羅古今博則博矣然率  
多文章之事記問之學至於刊列百度緝熙王猷至精  
至粹其道不雜比於通典非其倫也於戲今之人賤近  
而貴遠昧微而睹著得之者甚鮮知之者甚稀可為長  
太息也翰嘗有斯志約乎舊史圖之不早竟為善述者  
所先故頗詳旨趣而為之序庶將來君子知吾道之不  
誣也左補闕李翰序

金定四月全三

原序

欽定四庫全書

史部十三

通典總目

政書類一

通制之屬

食貨

凡一十二卷

卷一至卷十二止

選舉

凡六卷

卷十三至卷十八止

職官

凡二十二卷

卷十九至卷四十止

禮

凡一百卷  
五卷

歷代沿革六十五卷開元禮三十

卷四十一

至

卷一百四十止

樂

凡七卷

卷一百四十一

至

卷一百四十七止

兵

凡一十五卷

卷一百四十八

至

卷一百六十二止

刑

凡八卷

卷一百六十三

至

卷一百七十止

州郡 凡一十四卷

卷一百七十一至卷一百八十四止

邊防 凡十六卷

卷一百八十五至二百止

其各卷細目詳載本門卷首





欽定四庫全書

通典卷一

唐 京 兆 杜 佑 君 卿 纂

佑少嘗讀書而性且蒙固不達術數之藝不好章句之學所纂通典實采羣言徵諸人事將施有政夫理道之先在乎行教化教化之本在乎足衣食易稱聚人曰財洪範八政一曰食二曰貨管子曰倉廩實知禮節衣食足知榮辱夫子曰既富而教斯之謂矣夫行教化在乎

設職官設職官在乎審官才審官才在乎精選舉制禮以端其俗立樂以和其心此先哲王致治之大方也故職官設然後興禮樂焉教化隳然後用刑罰焉列州郡俾分領焉置邊防遏戎狄焉是以食貨為之首

十二卷選

舉次之

六卷

職官又次之

二十卷

禮又次之

百卷

樂又次之

七卷

刑又次之

大刑用甲兵十五卷其次五刑八卷

州郡又次之

十四卷

邊防末

之

十六卷

或覽之者庶知篇第之旨也

本初纂錄止於天寶之末其有要須

議論者亦便及以後之事

食貨

第一田制上

第二田制下 水利田 屯田

第三鄉黨 土斷 版籍並附

第四賦稅上

第五賦稅中

第六賦稅下

第七歷代盛衰戶口 丁中

第八錢幣上

第九錢幣下

第十漕運 鹽鐵

第十一鬻爵 榷酤 算緡 雜稅 平準

均輸附

第十二輕重

食貨一

田制上

唐魏

周

秦

漢

後漢

晉

宋

後

穀者人之司命也地者穀之所生也人者君之所治也

有其穀則國用備辨其地則人食足察其人則徭役均  
知此三者謂之治政夫地載而不棄也一著而不遷也  
國固而不動則莫不生殖聖人因之設井邑列比閭使  
察黎民之數賦役之制昭然可見也自秦孝公用商鞅  
計乃隳經界立阡陌雖獲一時之利而兼并踰僭興矣  
降秦以後阡陌既弊又謂隱覈在乎權宜權宜憑乎簿  
書簿書既廣必藉衆功藉衆功則政由羣吏政由羣吏  
則人無所信矣夫行不信之法委政於衆多之胥欲紀

人事之衆寡明地利之多少雖申商督刑撓首總算亦不可得而詳矣不變斯道而求理者未之有也夫春秋之義諸侯不得專封大夫不得專地若使豪人占田過制富等公侯是專封也買賣由己是專地也欲無流竄不亦難乎陶唐以前法制簡略不可得而詳也及堯遭

洪水天下分絕使禹平水土別九州

其分別疆理所在具州郡篇

冀

州厥土惟白壤

無塊曰壤

厥田惟中中

田第五

兗州厥土黑墳

色黑而墳起

厥田惟中下

第六

青州厥土白墳厥田惟上下

第三

徐州厥土赤埴墳

土黏曰埴

厥田惟上中

第二

揚州厥土惟塗

泥

地泉濕

厥田惟下下

第九

荊州厥土惟塗泥厥田惟下中

第八

荊河豫州厥土惟壤下土墳壚

高者壤下者壚疎也

厥田惟

中上

第四

梁州厥土青黎

色青黑沃壤也

厥田惟下上

第七

雍州厥

土惟黃壤厥田惟上上

第一

九州之地定墾者九百一十

萬八千二十頃虞夏殷三代凡千餘載其間定墾書冊

不存無以詳焉○周文王在岐

今扶風郡岐山縣

用平土之法

以為治人之道地著為本

地著謂安土

故建司馬法六尺為

步步百為畝畝百為夫夫三為屋屋三為井井十為通  
通十為成成十為終終十為同同方百里同十為封封  
十為畿畿方千里故丘有戎馬一疋牛三頭甸有戎馬  
四疋兵車一乘牛十二頭甲士三人步卒七十二人一  
同百里提封萬井戎馬四百疋車百乘此卿大夫采地  
之大者是謂百乘之家一封三百六十六里提封十萬  
井定出賦六萬四千井戎馬四千疋車千乘此諸侯之  
大者謂之千乘之國天子之畿內方千里提封百萬井



定出賦六十四萬井戎馬四萬疋兵車萬乘戎卒七十  
二萬人故曰萬乘之主小司徒之職乃均土地以稽其  
人民而周知其數上地家七人可任也者家三人中地  
家六人可任也者二家五人下地家五人可任也者家  
二人鄭玄曰均平也周猶徧也一家男女七人以上則授之以上地所養者衆也男女五人以下則授之以下地所養者寡也止以七人六人五人為率者有夫有婦然後為家自二人以至于十為九等七六五者為其中可任謂丁強任力役之事者出老者一人其餘男女強弱相半其大數也乃經土地而井  
牧其田野九夫為井四井為邑四邑為丘四丘為甸四

甸為縣四縣為都以任地事而令貢賦凡稅斂之事此謂

造都鄙也采地制井田異於鄉遂重立國小司徒為經之立其五溝五塗之界其制似井字因取名焉謂隰臯之地九夫為牧二牧當一井今造都鄙授民田有不易有一易有再易通率二而當一是之謂井牧昔夏少康在虞思有田一成有衆一旅一旅之衆而田一成則井牧之法先古然矣九夫為井者方一里九夫所治之田也四井為邑方二里四邑為丘方四里四丘為甸甸方八里旁加一里則方十里為一成積百井九百夫其中六十四井五百七十六夫出田稅三十六井三百二十四夫治洫四甸為縣方二十里四縣為都方四十里四都方八十里旁加十里乃得方百里為一同也積萬井九萬夫其四千九十六井三萬六千八百六十四夫出田稅二千三百四井二萬七千三百三十六夫治洫三千六百井三萬二千四百夫治澮井田之法備於一同今止

於都者采地食者皆四之一其制三等百里之國凡四都一都之田稅入於王五十里之國凡四縣一縣之田稅入於王二十五里之國凡四甸一甸之田稅入於王地事謂農牧衛虞貢謂九穀山澤之材也賦謂出車徒給徭役也任土之法以物地事授地職而待其政令

任土者任其力

勢所能生育且以制貢賦也物物色之以知其所宜之事而授農牧衛虞使職之以厘里任國

中之地以場圃任園地以宅田士田賈田任近郊之地

以官田牛田賞田牧田任遠郊之地以公邑之田任甸

地以家邑之田任稍地以小都之田任縣地以大都之

田任疆地

謂厘里者若今云邑居里矣厘民居之區域也里居也園樹果蓏之屬季秋於中為場樊

園為之園宅田者致仕之家所受之田也士相見禮曰宅者在邦則曰市井之臣在野則曰草茅之臣士讀為仕仕亦受田所謂圭田也孟子曰自卿以下必有圭田圭田五十畝賈田在市賈人其家所受田也官田庶人在官者其家所受田也牛田牧田畜牧者之家所受田也賞田者賞賜之田公邑謂六遂餘地天子使大夫治之自此以外皆然家邑大夫之采地小都卿之采地大都公之采地王子弟所食邑也疆五百里王畿界也皆言任者地之形實不方平如圖受田邑者遠近不得盡如制其所生育職貢取正於是耳民受田上

田夫百畝中田夫二百畝下田夫三百畝歲耕種者為不易上田休一歲者為一易中田休二歲者為再易下田三歲更耕之自爰其處

爰於也更謂三歲即與別家佃以均厚薄農民戶

人已受田其家衆男為餘夫亦以口受田如比

比例也必寐反

士工商家受田五口乃當農夫一人

一口田二十畝

此謂平土

可以為法者也若山林藪澤原陵淳鹵之地

淳盡也澤鹵之田不

生穀各以肥磽多少為差

磽確謂瘠薄之田

民年二十受田六十

歸田七十以上上所養也十歲以下上所長也十二以

上上所強也

勉強勸之令習事

孟子曰夫仁政必自經界始經

界不正井地不均穀祿不平是故暴君污吏必慢其經

界經界既正分田制祿可坐而定也秦孝公任商鞅

以三晉地狹人貧

三晉韓趙魏三卿  
今河東道之地

秦地廣人寡故草

不盡墾地利不盡出於是誘三晉之人利其田宅復三

代無知兵事而務本於內而使秦人應敵於外故廢井

田制阡陌任其所耕不限多少

孝公十二年之制

數年之間國

富兵強天下無敵○漢孝文時民近戰國皆多背本趨

末賈誼說上曰古之治天下至殲至悉故其畜積足恃

今背本而趨末遊食者甚衆是天下之大殘也

本農桑也末工

商也言人已棄農而務工商矣其  
食米粟者又甚衆也殘謂傷害

漢之為漢幾四十年

矣幾近公私之積猶可哀痛言年載已多而無儲積即不幸有方二

三千里之旱國胡以相恤卒然邊境有急數十萬之衆國胡以餽之兵旱相乘天下大屈今毆人而歸之農皆

著於本使天下各食其力末伎遊食之民轉而緣南畝

言皆趨農作則畜積足而人樂其所矣帝感誼言始開籍田

躬耕以勸百姓詔曰夫度田非益寡而計民未加益度謂

量計以口量地其於古猶有餘而食之甚不足者其咎安

在無乃百姓之從事於末以害農者蕃蕃多也為酒醪以

靡穀者多

靡散也靡讀曰靡

六畜之食焉者衆與細大之義吾

未能得其中

竹仲反

其與丞相列侯吏二千石博士議之

有可以佐百姓者率意遠思無有所隱也晁錯復說曰

聖王在上而民不凍饑者非能耕而食之織而衣之

食讀

曰為開其資財之道也故堯禹有九年之水湯有七年

之旱而國亡捐瘠者

捐謂人饑相棄捐也瘠瘦病也言無相棄捐而疫病者

以畜

積多而備先具也今海內為一土地人民之衆不避湯

禹加以亡天災數年之水旱而畜積未及者何也地有



遺利民有餘力生穀之士未盡墾山澤之利未盡出也  
遊食之民未盡歸農也民貧則奸邪生貧生於不足不  
足生於不農不農則不地著不地著則離鄉輕家民如  
鳥獸雖有高城深池嚴法重刑猶不能禁也夫寒之於  
衣不待輕煖苟禦風霜不求靡麗饑之於食不待甘旨旨美也饑寒  
至身不顧廉恥夫腹饑不得食膚寒不得衣雖慈父不  
能保其子君安能以有其民哉明主知其然也故務農  
桑薄稅斂廣畜積以實倉廩備水旱故民可得而有也

是故明君貴五穀而賤金玉今農夫五口之家其服役者不下二人

服事也

其能耕者不過百畝百畝之收不過

百石春耕夏耘秋穫冬藏伐薪樵治官府給徭役春不得避風塵夏不得避暑熱秋不得避陰雨冬不得避寒

凍四時之間亡日休息又私自送往迎來弔死問疾養

孤長幼在其中勤苦如此尚復被水旱之災急政暴賦

賦斂不時朝令而暮改當其有者半價而賣

本值千金者價得五

百亡者取倍稱之息

取一償二為倍稱舉也今俗所謂舉債

於是有賣田

宅鬻子孫以償債者矣方今之務莫若使民務農而已  
矣欲民務農在於貴粟貴粟之道在於使民以粟為賞  
罰帝從之其後務敦農本倉廩充實孝景元年制曰間  
者歲比不登民多乏食天絕天年朕甚痛之郡國或地  
硠陁無所農桑繫畜或地饒廣薦草莽草樹曰薦  
草深曰莽水泉  
利而不得徙其議民欲徙寬大地者聽之後元三年詔  
曰農天下之本也黃金珠玉饑不可食寒不可衣以為  
幣用不識其終始間歲或不登意為末者衆農民寡也

其令郡國務勸農桑益種樹可得衣食物孝武外事四  
夷內興功利役費並興而民去本董仲舒說上曰春秋  
它穀不書至於麥禾不成則書之以此見聖人於五穀  
最重麥與禾也今關中俗不好種麥是歲失春秋之所  
重而損生民之具也願陛下幸詔大司農使關中民益  
種宿麥令毋後時宿麥謂  
苗經冬仲舒又說上曰秦用商鞅之  
法改帝王之制除井田民得買賣富者田連阡陌貧者  
無立錫之地漢興循而未改古井田法雖難卒音行宜

少近古限民名田以贍不足

名田占田也各為立限不使富者過制則貧弱之家

可足也

塞并兼之路然後可善治也竟不能用元狩三年

遣謁者勸種宿麥舉吏人能假貸貧人者以名聞及末年帝悔征伐之事乃封丞相田千秋為富民侯下詔曰方今之務在於力農以趙過為搜粟都尉過能為代田

一畝三畦

畦壟也音工犬反字或作畎

歲代處故曰代田

代易也

古法

也后稷始畦田以二耜為耨

併兩耜而耕

廣尺深尺曰畦長

終畝一畝三畦一夫三百畦而播種於畦中

播布也種謂穀子

苗生葉以上稍耨隴草

耨鉏也

因隤其土以附苗根

隤謂下之

音類

故其詩曰或芸或耔黍稷凝凝

音擬

擬小雅甫田之詩

芸除草也耔附根也言苗稍壯每耨輒附根比

必寐反

盛

暑隴盡而根深能風與旱

能讀曰耐

故凝凝而盛也其耕耘

下種田器皆有便巧率十二夫為田一井一屋故畝五

頃

九夫為井三夫為屋夫百畝於古為十二頃古百步為畝漢時二百四十步為畝古千二百畝則得今五

頃用耦犂二牛三人一歲之收常過縵田畝一斛以上

者

縵田謂不耨者音莫幹反

善者倍之

善為耨者又過縵田二斛以上

過使教田太常

三輔

太常主諸陵有民故亦謂田種

大農置工巧奴與從事為作田器

二千石遣令長三老力田及里父老善田者受田器學

耕種養苗狀

為法意狀

民或苦少牛無以趨澤

趨讀曰趣及也澤雨之潤

澤

故平都令光教過以人輓

音晚犁

輓引也史失光姓

過奏光以

為丞教民相與庸輓犁

庸功也言換功共作也義與傭賃同

率多人者田

日三十畝少者十三畝以故田多墾闢過試以離宮卒

田其宮孺

而緣反

地

離宮別處之宮非天子所常居也孺餘也宮孺地謂外垣之內內垣之外

也諸緣河孺地廟垣孺地其義皆同守

課得穀皆多其

旁田晦一斛以上令命家田三輔公田

令使也命者教也令離宮卒教

其家田公田也

又教邊郡及居延城

居延張掖縣也時有甲卒也

是後邊城

河東弘農三輔太常民皆便代田用力少而得穀多至

孝昭時流民稍還田野墾闢頗有畜積孝宣地節三年

詔曰郡國宮館勿復修治流民還歸者假公田貸種食

種五穀種

孝元初元元年以三輔太常郡國公田及苑可省

者振業貧民江海陂湖園池屬少府者以假貧民勿租賦建昭五年詔曰方春農桑興百姓勸力自盡之時也



故是月勞農勸桑無使後時今不良之吏覆按小罪徵  
召證按興不急之事以妨百姓使失一時之作亡終歲  
之功公卿其明察申勅之孝成帝之時張禹占鄭白之  
渠四百餘頃他人兼并者類此而人彌困陽朔四年正  
月詔曰夫洪範八政以食為首斯誠家給刑錯之本也  
先帝飭農薄其租稅寵其強力令與孝弟同科間者民  
彌憤怠鄉本者少趨末者衆將何以矯之方東作時其  
令二千石勉勸農桑出入阡陌致勞來之書不云乎服

田力穡乃亦有秋其勗之哉孝哀即位師丹輔政建言古之聖王莫不設井田然後治乃可平孝文皇帝承亡周亂秦兵革之後天下空虛故務勸農桑帥以節儉民始充實未有并兼之害故不為民田及奴婢為限今累世承平豪富吏民貲數鉅萬而貧弱逾困蓋君子為政貴因循而重改作所以有改者將以救急也亦未可詳宜略為限天子下其議丞相孔光大司空何武奏請諸侯王列侯皆得名田國中列侯在長安公主名田縣道

及關內侯吏民名田皆無過三十頃諸侯王奴婢二百人列侯公主百人關內侯吏民三十人期盡三年犯者沒入官時田宅奴婢賈為減賤丁傅用事董賢隆貴皆不便也詔書且須後

須待也

遂寢不行孝平元始元年置

大司農部丞十三人人部一州勸農桑二年定墾田八

百二十七萬五百三十頃蓋紀漢盛時之數

據元始二年戶一千

二百二十三萬三千餘戶合得田六十七畝百四十六步有奇

王莽篡位下令曰古者

設井田則國給人富而頌聲作此唐虞之道三代所遵

行也秦為無道壞聖制廢井田是以兼并起貪鄙生強者規田以千數弱者曾無立錫之居於是更名天下田曰王田奴婢曰私屬皆不得買賣其男口不盈八而田過一井者分餘田與九族鄰里鄉黨故無田今當受田者如制度敢有非井田聖制無法惑衆者投諸四裔於是農商失業食貨俱廢百姓涕泣於市道坐賣買田宅奴婢自諸侯卿大夫至於庶人抵罪者不可勝數經二年餘中郎區博諫曰井田雖聖王法其廢已久周道既

衰而人不從秦順人心改之可以獲大利故滅廬井而置阡陌遂王諸夏訖今海內未厭其弊今欲違人心追復千載絕迹雖堯舜復生而無百年之漸不能行也莽知人愁乃許買賣其後百姓日以凋弊○後漢之初百姓虛耗率土遺黎十纔一二光武建武十五年詔下州郡檢覆墾田頃畝及戶口年紀河南尹張伋及諸郡守十餘人坐度田不實下獄死順帝建康元年定墾田六百八十九萬六千二百七十一頃五十六畝九十四步

據建康元年戶九百九十四萬六千  
荀悅論曰昔文帝  
九百九十每戶合得田七十畝有奇

十三年六月詔除人田租且古者十一而稅以為天下  
之中正今漢人田或百一而稅可謂鮮矣然豪富強人  
占田逾多其賦大半官收百一之稅而人輸豪強大半  
之賦官家之惠優於三代豪強之暴酷於亡秦是以惠  
不下通而威福分於豪人也今不正其本而務除租稅  
適足以資富強也孝武皇帝時董仲舒嘗言宜限人占  
田至哀帝時乃限人占田不得過三十頃雖有其制卒

難施行然三十頃又不平矣且夫井田之制不宜於人衆之時田廣人寡苟為可也然欲廢之於寡立之於衆土田布列在豪強卒而革之並有怨心則生紛亂制度難行由是觀之若高祖初定天下光武中興之後人衆稀少立之易矣既未悉備井田之法宜以口數占田為之立限人得耕種不得賣買以贍貧弱以防兼并且為制度張本不亦宜乎雖古今異制損益隨時然紀綱大畧其致一也崔寔政論曰昔聖人分口耕耦地各相副

適使人饑飽不變勞逸齊均富者不足僭差貧者無所  
企慕始暴秦隳壞法度制人之財既無紀綱而乃尊獎  
并兼之人烏氏以牧豎致財寵比諸侯寡婦清以攻丹  
殖業禮以國賓於是巧猾之萌遂肆其意上家累鉅億  
之貲斥地侔封君之土行苞苴以亂執政養劔客以威  
黔首專殺不辜號無市死之子生死之奉多擬人主故  
下戶踣蹶無所時足乃父子低首奴事富人躬帥妻孥  
為之服役故富者席餘而日熾貧者躡短而歲蹶歷代



為虜猶不贍於衣食生有終身之勤死有暴骨之憂歲  
小不登流離溝壑嫁妻賣子其所以傷心腐藏失生人  
之樂者蓋不可勝陳故古有移人通財以贍蒸黎今青

徐兗冀

後漢青州今北海濟南淄川東萊東牟高密平原等郡地徐州今東海瑯琊彭城臨淮廣陵等

郡地兗州今陳留靈昌濮陽東平濟陽濟陰魯等郡地冀州今魏郡鄴郡鉅鹿清河常山趙郡博陵信都景城  
等郡人稠土狹不足相供而三輔左右及涼幽州內附

近郡

涼州今安定彭原之北天水隴西並其地幽州今上谷范陽之北東至遼東並其地

皆土曠

人稀厥田宜稼悉不肯墾小人之情安土重遷寧就饑

餒無適樂土之慮故人之為言瞑也謂瞑瞑無所知猶  
羣羊聚畜須主者牧養處置置之茂草則肥澤繁息置  
之磽鹵則零丁耗減是以景帝六年詔郡國令人得去  
磽狹就寬肥至武帝遂徙關東貧人於隴西北地西河  
上郡會稽隴西今隴西天水金城會寧安鄉等郡地北地今安定彭原安化平原靈武五原等郡地北地今銀川新泰西河昌化等郡地上郡今延安咸寧洛交中部等郡地會稽今浙江東晉陵郡以東直至信安永嘉郡地凡七十二萬五千口後加徙猾吏於關內今宜  
復遵故事徙貧人不能自業者於寬地此亦開草闢土

振人之術也仲長統昌言曰遠州縣界至數千而諸夏有十畝共桑之迫遠州有曠野不發之田代俗安土有死無去君長不使誰能自往緣邊之地亦可因罪徙人便以守禦○晉武帝泰始八年司徒石苞奏州郡農桑未有殿最之制宜增掾屬令史有所巡幸帝從之苞既明勸課百姓安之平吳之後有司奏王公以國為家京城不宜復有田宅今未暇作諸國邸當使城中有往來之處近郊有芻橐之田今可限之國王公侯京城得有

宅一處近郊田大國十五頃次國十頃小國七頃城內  
無宅城外有者皆聽留之男子一人占田七十畝女子  
三十畝其丁男課田五十畝丁女二十畝次丁男半之  
女則不課其官第一品五十頃每品減五頃以為差第  
九品十頃而又各以品之高卑蔭其親屬多者及九族  
少者三代宗室國賓先賢之後士人子孫亦如之而又  
得蔭人以為衣食客及佃客量給官品以為差降

自西  
晉則

有蔭客之制至東晉其  
數更加具賦稅上篇

○宋孝武帝大明初羊希為尚

書左丞時揚州刺史西陽王子尚上言山湖之禁雖有  
舊科人俗相因替而不奉煥許氣反山封水保為家利自

頃以來頽弛日甚富強者兼嶺而占貧弱者薪蘓無託  
至漁採之地亦又如茲斯實害理之深弊請損益舊條  
更申恒制有司檢壬辰詔書擅占山澤強盜律論賊一  
貫以下皆棄市希以壬辰之制其禁嚴刻事既難遵理  
與時弛而占山封水漸染復滋更相因仍便成先業一  
朝頓去易致怨嗟今更刊革立制五條凡是山澤先恒

爌爌

力居反

種竹木薪果為林仍及陂湖江海魚梁鰭鱉

七由反即移反

恒加工修作者聽不追舊官品第一第二品聽

占山三頃第三第四品二頃五十畝第五第六品二頃

第七第八品一頃五十畝第九品與百姓一頃皆依定

格條上貲簿若先已占山不得更占先占足若非前條

舊業一不得禁有犯者水土一尺以上並計贓依常盜

論除晉咸康二年壬辰之科從之時山陰縣人多田少

孔靈符表請徙無貲之家於餘姚鄞

莫侯反

鄞三縣墾開

湖田

餘姚今會稽郡縣鄞  
鄞則今餘姚郡地

帝令公卿博議咸曰夫訓農

修政有國所同土著之人習翫日久如京師無田不聞  
徙居他縣尋山陰豪族富室頃畝不少貧者肆力非為  
無處又緣湖居人魚鴨為業小人習始既難勸之未易  
遠廢之疇方翦荆棘率課窮乏其事彌難資徙粗立徐  
行無晚帝違衆議徙人並成良業○後魏明帝永興中  
頻有水旱神瑞二年又不熟於是分簡尤貧者就食山  
東勅有司勸課田農曰前志有之人生在勤勤則不匱

凡庶人不畜者祭無牲不耕者祭無盛不樹者死無槨  
不蠶者衣無帛不績者喪無練教行三農生殖九穀自  
是人皆力勤歲數豐穰畜牧滋息太武帝初為太子監  
國曾令有司課畿內之人使無牛家以人牛力相貿墾  
殖鋤耨其有牛家與無牛家一人種田二十畝償以耘  
鋤功七畝如是為差至與老小無牛家種田七畝老小  
者償以鋤功二畝皆以五口下貧家為率各列家別口  
數所種頃畝明立簿目所種者於地首標題姓名以辨



播殖之功孝文太和元年三月詔曰去年牛疫死大半  
今東作既興人須肆業有牛者加勤於常歲無牛者倍  
傭於餘年一夫制理四十畝中男二十畝無令人有餘  
力地有遺利時李安世上疏曰臣聞量人畫野經國大  
式邑地相叅致理之本井稅之興其來日久田萊之數  
制之以限蓋欲使土不曠功人罔遊力雄擅之家不獨  
膏腴之美單陋之夫亦有頃畝之分竊見州郡之人或  
因年儉流移棄賣田宅漂居異鄉事涉數代三長既立

始返舊墟廬井荒涼桑榆改植事已歷遠易生假冒彊宗豪族肆其侵凌遠認晉魏之家近因親舊之驗年載稍久鄉老所惑羣證雖多莫可取據各附親知互有長短兩證徒具聽者猶疑爭訟遷延連紀不判良疇委而不開柔桑枯而不採欲令家豐歲儲人給資用其可得乎愚謂今雖桑井難復宜更均量審其徑術令分藝有准力業相稱細人獲資生之利豪右靡餘地之盈無私之澤乃播均於兆庶如阜如山可有積於比戶矣又所

爭之田宜限年斷事久難明悲屬今主然後虛詐之人  
絕於覲覲守分之士免於凌奪帝深納之均田之制起  
於此矣九年下詔均給天下人田諸男夫十五以上受  
露田四十畝不栽樹者謂之露田婦人二十畝奴婢依良丁牛一  
頭受田三十畝限四牛所授之田率倍之三易之田再  
倍之以供耕作及還受之盈縮人年及課則受田老免  
及身沒則還田奴婢牛隨有無以還受諸桑田不在還  
受之限但通入倍田分於分雖盈不得以充露田之數

不足者以露田充倍諸初受田者男夫一人給田二十畝課蒔餘種桑五十樹棗五株榆三根非桑之土夫給一畝依法課蒔餘果及多種桑榆者不禁諸應還之田不得種桑榆棗果種者以違令論地入還分諸桑田皆為代業身終不還恒從見口有盈者無受無還不足者受種如法盈者得賣其盈不足者得買所不足不得賣其分亦不得買過所足諸麻布之土男夫及課別給麻田十畝婦人五畝奴婢依良皆從還受之法諸有舉戶

老小殘疾無受田者年十一以上及廢疾者各授以半  
夫田年踰七十者不還所受寡婦守志者雖免課亦授  
婦田諸還受人田恒以正月若始受田而身亡及賣買  
奴婢牛者皆至明年正月乃得還受諸土廣人稀之處  
隨力所及官借人種蒔後有來居者依法封授諸地狹  
之處有進丁受田而不樂遷者則以其家桑田為正田  
分又不足不給倍田又不足家內人別減分無桑之鄉  
準此為法樂遷者聽逐空荒不限異州他郡唯不聽避

勞就逸其地足之處不得無故而移諸人有新居者三口給地一畝以為居室奴婢五口給一畝男女十五以上因其地分口課種菜五分畝之一諸一人之分正從正倍從倍不得隔越他畔進丁受田者恒從所近若同時俱受先貧後富再倍之田放此為法諸遠流配謫無子孫及戶絕者墟宅桑榆盡為公田以供授受授受之次給其所親未給之間亦借其所親諸宰人之官各隨匠給公田刺史十五頃太守十頃治中別駕各八頃縣

令郡丞六頃更代相付賣者坐如律

職分田起於此

通典卷一



欽定四庫全書

通典卷二

唐 京兆杜佑君卿纂

食貨二

田制下

北齊

後周

隋

大唐

北齊給授田令仍依魏朝每年十月普令轉授成丁而授丁老而退不聽賣易文宣帝天保八年議徙冀定瀛無田之人謂之樂遷於幽州寬鄉以處之

秦漢州郡則大魏晉年代

又遠改移分析或未易知以此要有解釋近  
代制置今多因習則不暇繁叙他皆類此 武成帝河

清三年詔每歲春月各依鄉土早晚課人農桑自春及  
秋男子十五以上皆營蠶桑孟冬布田畝蠶桑之月婦  
女十五以上皆營蠶桑孟冬刺史聽審教之優劣定殿  
最之科品人有人力無牛或有牛無力者須令相便  
皆得納種使地無遺利人無遊手又令男子率以十八  
受田輸租調二十充兵六十免力役六十六退田免租  
調京城四面諸坊之外三十里內為公田受公田者三

縣代遷內職事官一品以下逮於羽林武賁各有差其  
外畿郡華人官第一品以下羽林武賁以上各有差職  
事及百姓請墾田者名為永業田奴婢受田者親王止  
三百人嗣王二百人第二品嗣王以下及庶姓王百五  
十人正三品以上及皇宗百人七品以上八十人八品  
以下至庶人六十人奴婢限外不給田者皆不輸其方  
百里外及州人一夫受露田八十畝婦人四十畝奴婢  
依良人限數與者在京百官同丁牛一頭受田六十畝

限止四牛每丁給永業二十畝為桑田其田中種桑五十根榆三根棗五根不在還受之限非此田者悉入還受之分土不宜桑者給麻田如桑田法關東風俗傳曰其時強弱相凌恃勢侵奪富有連畛亘陌貧無立錫之地昔漢氏募人徙田恐遺墾課令就良美而齊氏全無斟酌雖有當年權格時暫施行爭地文案有三十年不了者此由授受無法者也其賜田者謂公田及諸橫賜之田魏令職分公田不問貴賤一人一項以供芻秣自

宣武出獵以來始以永賜得聽賣買遷鄴之始濫職衆多所得公田悉從貨易又天保之代曾遙壓首人田以充公簿比武平以後橫賜諸貴及外戚佞寵之家亦以盡矣又河渚山澤有司耕墾肥饒之處悉是豪勢或借或請編戶之人不得一壟糾賞者依令口分之外知有買匿聽相糾列還以此地賞之至有貧人實非賸長買匿者苟貪錢貨詐吐壯丁口分以與糾人亦既無田即便逃走帖賣者帖荒田七年熟田五年錢還地還依令

聽許露田雖復不聽賣買賣亦無重責貧戶因王課  
不濟率多貨賣田業至春困急輕致藏走亦懶惰之人  
雖存田地不肯肆力在外浮遊三正賣其口田以供租  
課比來頻有還人之格欲以招慰逃散假使暫還即賣  
所得之地地盡還走雖有還名終不肯住正由縣聽其  
賣帖田園故也廣占者依令奴婢請田亦與良人相似  
以無田之良口比有地之奴牛宋世良天保中獻書請  
以富家牛地先給貧人其時朝列稱其合理

宋孝  
王撰

○後

周文帝霸政之初創置六官司均掌田里之政令凡人  
口十以上宅五畝口七以上宅四畝口五以上宅三畝  
有室者田百四十畝丁者田百畝○隋文帝令自諸王  
以下至於都督皆給永業田各有差多者至百頃少者  
至三十頃其丁男中男永業露田皆遵後齊之制並課  
樹以桑榆及棗其田宅率三口給一畝京官又給職分  
田一品者給田五頃至五品則為田三頃其下每品以  
五十畝為差至九品為一頃外官亦各有職分田又給

公廨田以供用開皇九年任墾田十九百四十萬四千

二百六十七頃

隋開皇中戶總八百九十萬七千五百三十六按定墾之數每户合墾田二頃

餘也開皇十二年文帝以天下戶口歲增京輔及三河地

少而人衆衣食不給議者咸欲徙就寬鄉帝乃發使四方出均天下之田其狹鄉每丁纔至二十畝老小又少

焉至大業中天下墾田五千五百八十五萬四千四十

頃

按其時有戶八百九十萬七千五百三十六則每户合得墾田五頃餘恐本史非實

○大唐開

元二十五年令田廣一步長二百四十步為畝百畝為



頃

自秦漢以降即二百四十步為畝非獨始於國家蓋具今文耳國家程式雖則具存今所在纂錄不可悉

載但取其朝夕要切冀易精詳乃臨事不惑

丁男給永業田二十畝口分田

八十畝其中男年十八以上亦依丁男給老男篤疾廢疾各給口分田四十畝寡妻妾各給口分田三十畝先永業者通充口分之數黃小中丁男子及老男篤疾廢疾寡妻妾當戶者各給永業田二十畝口分田二十畝應給寬鄉並依所定數若狹鄉所受者減寬鄉口分之半其給口分田者易田則倍給

寬鄉三易以上者仍依鄉法易給

其永

業田親王百頃職事官正一品六十頃郡王及職事官  
從一品各五十頃國公若職事官正二品各四十頃郡  
公若職事官從二品各三十五頃縣公若職事官正三  
品各二十五頃職事官從三品二十頃侯若職事官正  
四品各十四頃伯若職事官從四品各十頃子若職事  
官正五品各八頃男若職事官從五品各五頃上柱國  
三十頃柱國二十五頃上護軍二十頃護軍十五頃上  
輕車都尉十頃輕車都尉七頃上騎都尉六頃騎都尉

四頃驍騎尉飛騎尉各八十畝雲騎尉武騎尉各六十畝其散官五品以上同職事給兼有官爵及勲俱應給者唯從多不並給若當家口分之外先有地非狹鄉者並即廻受有贖追收不足者更給諸永業田皆傳子孫不在收授之限即子孫犯除名者所承之地亦不追每畝課種桑五十根以上榆棗各十根以上三年種畢鄉土不宜者任以所宜樹充所給五品以上永業田皆不得狹鄉受任於寬鄉隔越射無主荒地充

即買陰賜田充者雖狹鄉

亦聽其六品以下永業即聽本鄉取還公田充額於寬鄉

取者亦聽應賜人田非指的處所者不得狹鄉給其應

給永業人若官爵之內有解免者從所解者追

即解免不盡者

隨所降品追

其餘名者依口分例給自外及有賜田者並追

若當家之內有官爵及少口分應受者並聽迴給有贖

追收其因官爵應得永業未請及未足而身亡者子孫

不合追請也諸襲爵者唯得承父祖永業不合別請若

父祖未請及未足而身亡者減始受封者之半給其州

縣縣界內所有部受田悉足者為寬鄉不足者為狹鄉  
諸狹鄉田不足者聽於寬鄉遙受應給園宅地者良口  
三口以下給一畝每三口加一畝賤口五口給一畝每  
五口加一畝並不入永業口分之限其京城及州郡縣  
郭下園宅不在此例諸京官文武職事職分田一品一  
十二頃二品十頃三品九頃四品七頃五品六頃六品  
四頃七品三頃五十畝八品二頃五十畝九品二頃並  
去京城百里內給其京兆河南府及京縣官人職分田

亦准此即百里外給者亦聽諸州及都護府親王府官人職分田二品一十二頃三品一十頃四品八頃五品

七頃六品五頃

京畿縣亦准此

七品四頃八品三頃九品二頃

五十畝鎮戍關津岳瀆及在外監官五品五頃六品三頃五十畝七品三頃八品二頃九品一頃五十畝三衛中郎將上府折衝都尉各六頃中府五頃五十畝下府及郎將各五頃上府果毅都尉四頃中府三頃五十畝下府三頃上府長史別將各三頃中府下府各二頃五

十畝親王府典軍五頃五十畝副典軍四頃十牛備身

左右太子十牛備身各三頃

親王府文武官隨府出藩者於在所處給

諸軍

上折衝府兵曹二頃中府下府各一頃五十畝其外軍校尉一頃二十畝旅師一頃隊正副各八十畝皆於領所州縣界內給其校尉以下在本縣及去家百里內領者不給諸驛封田皆隨近給每馬一疋給地四十畝若驛側有牧馬之處疋各減五畝其傳送馬每疋給田二十畝諸庶人有身死家貧無以供葬者聽賣水業田即

流移者亦如之樂遷就寬鄉者并聽賣口分

賣充住宅  
邸店碾磑

者雖非樂遷  
亦聽私賣

諸買地者不得過本制雖居狹鄉亦聽依

寬制其賣者不得更請凡賣買皆須經所部官司申牒

年終彼此除附若無文牒輒賣買財沒不追地還本主

諸以工商為業者永業口分田各減半給之在狹鄉者

並不給諸因王事沒落外藩不還有親屬同居其身分

之地六年乃追身還之日隨便先給即身死王事者其

子孫雖未成丁身分地勿追其因戰傷及篤疾廢疾者



亦不追減聽終其身也諸田不得貼賃及質違者財沒  
不追地還本主若從遠役外任無人守業者聽貼賃及  
質其官人永業田及賜田欲賣及貼賃者皆不在禁限  
諸給口分田務從便近不得隔越若因州縣改易隸地  
入他境及犬牙相接者聽依舊受其城居之人本縣無  
田者聽隔縣受

雖有此制開元之季天寶以來法令弛壞魚并之弊有踰於漢成哀之間又

田令在京諸司及天下府州縣兼折衝府鎮戍關津嶽  
瀆等公廨田職分田各有差諸職分陸田限三月三十

日稻田限四月三十日以前上者並入後人以後上者  
入前人其麥田以九月三十日為限若前人自耕未種  
後人酬其功直已自種者准租分法其價六斗以下者  
依舊定以上者不得過六斗並取情願不得抑配親王  
出藩者給地一頃作園若城內無可開拓者於近城便  
給如無官田取百姓地充其地給好地替天寶中應受  
田一千四百三十萬三千八百六十二頃十三畝

按十四年

有戶八百九十萬餘計定墾之數每户合一頃六十餘畝至建中初分遣黜陟使按比墾田田數都得百十餘

萬頃

水利田

周

秦

漢  
後魏  
大唐

後漢

晉

東晉

宋

魏文侯使李悝作盡地力之教以為地方百里提封九

萬頃除山澤邑居三分去一為田六百萬畝理田勤謹

則畝益三斗不勤則損亦如之地方百里之增減輒為

粟百八十萬石必雜五種以備災害力耕數耘收穫如

寇盜之至

謂促遽之甚恐  
為風雨損之

還廬樹桑

還遠也

菜如有畦瓜

瓠果蓏

木實曰果草實曰蓏  
茹所食之菜畦區也

殖於疆場至曾孫襄王以

史起為鄴令起進曰魏氏之行田也以百畝賦田之法一夫百畝

鄴獨二百畝是田惡也漳水在其旁西門豹為鄴令不

知用是不知也於是遂引漳水溉鄴以富魏之河內民

歌之曰鄴有賢令今為史公決漳水兮灌鄴旁終古焉

鹵兮生稻梁鹵即斥鹵也鹵鹹苦也謂鹹鹵之地史記云西門豹引漳水溉鄴誤其後韓

聞秦之好興事欲疲之無令東伐乃使水工鄭國間說

秦令鑿涇水自中山西抵瓠口為渠並蒲浪反壯山東注

洛三百餘里欲以溉田中作而覺秦欲殺國國曰始臣

為閘然渠成亦秦之利也秦以為然卒使就渠渠就用

注填閘之水溉畝之地四萬餘頃收皆畝一鍾於是

關中為沃野無凶年命曰鄭國渠

閘與於同

○秦平天下以

李冰為蜀守冰壅江水作堋

部用反

穿二江成都中雙過

郡下以通舟船因以溉灌諸郡於是蜀沃野千里號為

陸海○漢文帝以文翁為蜀郡太守穿煎泲

羊朱反

口溉

灌繁田千七百頃人獲其饒武帝元光中大司農鄭當

時言引渭穿渠起長安並南山下至河三百餘里渠下

民田萬餘頃又得以溉田益肥關中之地得穀天子

以為然令齊水工徐伯表

巡行表記之

悉發卒數萬人穿漕

渠三歲而通渠下民頗得以溉田矣其後河東守番係

請穿渠引汾溉皮氏汾陰下引河溉汾陰蒲坂下

皮氏今龍

門縣地屬絳郡汾陰今寶鼎縣地蒲坂今河東縣地並屬河東郡

度可得五千頃五千

頃故盡河壩棄地民焚牧其中耳今溉田之度可得穀

二百萬石以上天子以為然發卒數萬人作渠田數歲

河移徙渠不利則田者不能常種久之河東渠田廢與

越人今少府以為稍入

時越人有從者以出與之其租稅入少府也稍漸也其入未多

故謂之稍

其後莊熊羆言臨晉民

即今馮翊縣也

願穿洛以溉重泉

以東萬餘頃

重泉在今馮翊郡界今有乾坑是熊羆之所穿渠

故惡地誠得水

可令畝十石於是為發卒萬餘人穿渠自徵音懲引洛水

至商顏下

徵在馮翊即今郡之澄城縣商顏今馮翊縣界

岸善崩

洛水

乃鑿井

深者四十餘丈往往為井井下相通行水水類以絕商

顏

下流類

東至山嶺十餘里間井渠之開自此始穿渠得

龍骨故名曰龍首渠作之十餘歲渠頗通猶未得其饒

是時用事者爭言水利朔方西河河西酒泉皆引河及

川谷以溉田而關中漳渠靈軹引諸水汝南九江引淮

東海引鉅定

澤名

泰山下引汶水皆穿渠為溉田各萬餘

頃佗小渠陂山通道不可勝言自鄭國渠起至元鼎六

年百三十六歲而倪寬為左內史奏請穿鑿六輔渠

在鄭

國渠之裏今尚謂之輔渠亦曰六渠

以益溉鄭國傍高仰之田

素不得鄭國之溉灌

者仰為上向

帝曰農天下之本也泉流灌漑所以育五穀也

左右內史地名山川原甚衆細民未知其利故為通溝



瀆畜陂澤所以備旱也今內史稻田租挈重不與郡同

租挈收田租之約今郡為四方諸郡

其議減令吏民勉農盡地利平徭行

水勿使失時

平徭者均齊渠堰之力役謂俱得水之利

後十六歲趙中大夫

白公

此時無公爵蓋相呼尊老之稱也

復奏穿渠引涇水首起谷口尾

入櫟

音陽谷口今雲陽縣治谷是

注渭中袤二百里溉田四千五

百餘頃因名白渠民得其饒歌之曰田於何所池陽谷

口鄭國在前白渠起後

鄭國興於秦時故云前也

舉鍤為雲決渠為

雨

鍤鍤

涇水一石其泥數斗且溉且糞長我禾黍

水停淤泥可以

當衣食京師億萬之口言此兩渠之饒也元帝建昭中邵

信臣為南陽太守於穰縣理南六十里造鉗盧陂累石  
為隄傍開六石門以節水勢澤中有鉗盧王池因以為  
名用廣溉灌歲歲增多至三萬頃人得其利及後漢杜  
詩為太守復修其業時歌之曰前有邵父後有杜母○

後漢章帝建初中王景為廬江太守郡部安豐縣有楚  
孫叔敖所起芍陂先是荒廢景重修之境內豐給

其陂  
徑百

里灌田萬頃音鵲  
今壽春郡安豐縣界

順帝永和五年馬臻為會稽太守

始立鏡湖築塘周廻三百十里灌田九千餘頃至今人  
獲其利○晉武帝咸寧元年詔曰今年霖雨過差又有  
蟲災潁川襄城自春以來略不下種深以為慮主者何  
以為百姓計當陽侯杜元凱上疏曰臣輒思惟今者水  
災東南特劇非但五穀不收居積并損下田所在涇汙  
高地皆多堯壻百姓困窮方在來年雖詔書切告長吏  
二千石為之設計不廓開大制定其趣舍之宜恐徒文  
其所益蓋薄當今秋夏疏食之時而百姓已有不贍前

至冬春野無青草則必指仰官穀以為生命此乃一方  
之大事不可不早為思慮臣愚謂既以水為田當恃魚  
菜螺蚌而洪波汎溢貧弱者終不能得今者宜大壞兗  
及荊河州東界兗州東界今濟陽濟陰東平魯郡之間  
荊河州東界今汝南汝陰譙郡之間也  
諸陂隨其所歸而宣導之令饑者盡得水產之饒百姓  
不出境界之內朝暮野食此目下日給之益也水去之  
後填淤之田畝收數鍾至春大種五穀五穀必豐此又  
明年之益也杜君又言諸欲修水田者皆以火耕水耨

為便非不爾也然此施於新田草萊與百姓居相絕離者耳往者東南草創人稀故得火田之利頃來戶口日增而陂堰歲決良田變生蒲葦人居沮澤之際水陸失宜放牧絕種樹木立枯皆陂之害也陂多則土薄水淺潦不下潤故每有雨水輒復橫流延及陸田言者不思其故因云此土不可陸種臣計漢之戶口以驗今之陂處皆陸業也其或有舊堰則堅完修固非今所謂當為人害也臣見尚書胡威啟宜壞陂其言懇至臣又見宋

漢侯相應遵上便宜求壞泗陂徙運道時下都督度支  
共處當各據所見不從遵言臣按遵上事運道東詣壽  
春有舊渠可不由泗陂出泗陂在彼地界壞地凡萬三  
千餘頃傷敗成業遵縣領應佃二千六百口可謂至少  
而猶患地狹不足肆力此皆水之為害也當所共卹而  
都督度支方復執異非所見之難直以不同害理也人心  
所見既不同利害之情又有異軍家之與郡縣士大夫  
之與百姓其意莫有同者此皆偏其利以忘其害此理

之所以未盡而事之所以多患也臣又按荊河州界中  
度支所領佃者州郡大軍雜士凡用水田七千五百餘  
頃耳計三年之儲不過二萬餘頃以常理言之無為多  
積無用之水況於今者水滂沱溢大為災害臣以為宜  
發明詔勅刺史二千石漢氏舊堰及山谷私家小陂皆  
當修繕以積水其諸魏氏以來所造立及諸因雨決溢  
蒲葦馬腸陂之類皆決瀝之長吏二千石躬先勸戒諸  
食力之人並一時附功令比及水凍得粗枯涸其所修

功實之人皆以畀之其舊陂堰溝渠當有所補塞者比  
尋求微跡一如漢時故事早為部分列上須冬間東南  
休兵交代各留一月以佐之夫川瀆有常流地形有定  
體漢氏居人衆多猶以無患今因其所患而宣瀉之蹟  
古事以明近大理昭然可坐論而得臣不勝愚意嘗竊  
謂最是今日之實益也朝廷從之○東晉張闓音開為晉  
陵內史時所部四縣並以旱失田闓乃立曲阿新豐塘  
今丹陽郡丹陽縣界溉田八百餘頃每歲豐稔葛洪為其頌乃徵



入拜大司農○宋文帝元嘉七年劉義欣為荊河刺史

鎮壽陽

今壽春郡也

於時土境荒毀百姓離散義欣綱維補

緝隨宜經理芍陂良田萬頃隄堰久壞秋夏常苦旱義

欣遣諮議參軍殷肅循行修理因舊溝引淝

匹詣反

水入

陂

淝水名在汝南

代木開濬水得通涇由是遂豐稔○後魏刁

雍為薄骨律鎮將至鎮上表曰富平西三十里

薄骨律鎮今靈

武郡富平今迴樂縣

有父山南北二十六里東西四十五里鑿以

通河似禹舊迹其兩岸作溉田大渠廣十餘步山南引

水入此渠中計昔時高於河水不過一丈河水激急沙土漂流今日此渠高於河水二丈三尺又河水侵射往往崩頽渠既高縣水不得上雖復諸處按舊引水水亦難求今艾山北中有洲渚水分為二西河小狹水廣百四十步臣今請入來年正月於河西高渠之北八里分河之下五里平地鑿渠廣十五步深五尺築其兩岸令高一丈北行四十里還入古之高渠即循高渠而北復八十里合百二十里大有良田計用四千人四十日功渠

得成就所欲鑿新渠口河下五尺水不得入今求從小河東南岸斜斷到西北岸計長二百七十步廣十步高二丈絕斷小河二十日功計得成畢合計用功六十日小河之水盡入新渠水則充足溉官私田四萬餘頃旬日之間則水一徧水凡四溉穀得成實從之公私獲其利裴延儁為幽州刺史范陽郡有舊沈渠徑五十里漁陽燕郡有故戾諸堰廣袤三十里皆廢毀多時莫能修復水旱不調人多饑餒延儁自度水形營造未幾而就

溉田萬餘頃為利十倍○大唐貞觀十八年李襲稱為揚州大都府長史乃引雷陂水又築句城塘以溉田八百餘頃百姓獲其利徵拜太府卿人至今賴之永徽六年雍州長史長孫祥奏言往日鄭白渠溉田四萬餘頃今為富商大賈競造碾磴堰遏費水渠流梗澀止溉一萬許頃請修營此渠以便百姓至於鹹鹵亦堪為水田高宗曰疏導渠流使通溉灌濟汲炎旱應大利益太尉無忌對曰白渠水帶泥淤灌田益其肥美又渠水發源

本高向下枝分極衆若使流至同州則水饒足比為礪  
礪用水洩渠水隨入滑加以壅遏耗竭所以得利遂少  
於是遣祥等分檢渠上礪礪皆毀之至大歷中水田纔  
得六千二百餘頃

屯田

漢

魏

晉

東晉

齊

後魏

北齊

漢昭帝始元二年詔發習戰射士詣朔方調

徒釣反

故吏

將

子亮反

屯田張掖郡

調發遣之也故吏前為官職者令其郡率戰射士於張掖為屯

孝

宣帝神爵元年遣後將軍趙充國將兵擊先零羌充國

以擊虜殄滅為期乃欲罷騎兵屯田以待其弊奏曰臣所將吏士馬牛食月用糧穀十九萬九千六百三十斛鹽千六百九十三斛芟藁二十五萬二百八十六石

石百

二十斤

難久不解徭役不息又恐他夷卒有不虞之變且

羗虜易以計破難用兵碎也故臣愚心以為擊之不便

計度臨羗東至浩

音告 疊

音門即金城郡廣武縣地臨羗在今西平郡也

羗虜故

田及公田民所未墾可二千頃以上願罷騎兵留弛刑應募及淮陽汝南步兵與吏私從者合凡萬二百八十

一人用穀月二萬七千三百六十三斛鹽三百八斛分

屯要害處永解漕下繕鄉亭浚溝渠

漕下以水運木而下也繕補也

理

湟

音皇 音陘 夾

以西道橋七十所令可至鮮水左右田事出

賦人二十畝

田事出謂至春人出營田也賦謂班與之

至四月草生發郡騎

及屬國胡騎伉健各千倅馬什二就草

倅副也什二者千騎則與副馬

二百死也

為田者遊兵以充入金城郡益積蓄省大費今大

司農所轉穀至者足支萬人一歲食謹上田處及器用

簿唯陛下裁許之上報曰如將軍之計充國又奏曰今

留步士萬人屯田地勢平易臣愚以為屯田內有亡費之利外有守禦之備騎兵雖罷虜見萬人留田為必禽之具其土崩歸德宜不久矣詔罷兵獨充國留屯田大獲地利明年遂破先零○魏武既破黃巾欲經畧四方而苦軍食不足羽林監潁川東祇建置屯田於是以任峻為典農中郎將募百姓屯田於許下

今潁川郡許昌縣也得穀

百萬斛郡國例置田官數年之中所在積粟倉廩皆滿廢帝齊王芳正始四年司馬宣王督諸軍伐吳時欲廣



田畜穀為滅賊資乃使鄧艾行陳項以東至壽春

自今淮陽

郡項城縣以東至壽春郡

艾以為田良水少不足以盡地利宜開河

渠可以大積軍糧又通漕運之道乃著濟河論以喻其  
指又以為昔破黃巾因為屯田積穀於許都以制四方  
今三隅已定事在淮南每大軍征舉運兵過半功費巨  
億以為大役陳蔡之間土下田良可省許昌左右諸稻  
田并水東下令淮北屯二萬人淮南三萬人十二分休  
常有四萬人且耕且守水豐常收三倍於西計除衆費

歲完五百萬斛以為軍資六七年間可積三千萬斛於淮上此則十萬之衆五年之食也以此乘吳無往而不克矣宣王善之皆如艾計遂北臨淮水自鍾離西南橫石以西盡泚

旁脂反

水四百餘里置一營六十人且耕且

守兼循廣淮陽百尺二渠上引河流下通淮潁大理諸陂於潁南北穿渠三百餘里溉田二萬頃淮南淮北皆相連接自壽春到京師農官兵田雞犬之聲阡陌相屬每東南有事大軍興衆汎舟而下達於江淮資食有儲

而無水害艾所建也○晉羊祜為征南大將軍鎮襄陽

吳石城守去襄陽七百餘里每為邊害祜患之竟以詭

計令吳罷守於是戍邏減半分以墾田八百餘頃大獲

其利祜之始至也軍無百日之糧及至季年有十年之

積太康元年平吳之後當陽侯杜元凱在荊州今襄陽郡修

邵信臣遺蹟邵信臣所作鉤盧陂六門堰並今南陽郡穰縣界時為荊州所統激用渚

音育諸水以浸原田萬餘頃分疆刊石使有定分公

私同利衆庶賴之號曰杜父舊水道唯汚漢達江陵千

數百里北無通路又巴丘湖沅湘之會表裏山川實為

險固荆蠻之所恃也預乃開揚口起夏水達巴陵千餘

里

夏水揚口在今江陵縣界巴陵即今郡

內瀉長江之險外通零桂之漕

零陵桂陽並郡

南土歌之曰後世無叛由杜翁孰識智名與勇

功○東晉元帝督課農功二千石長吏以入穀多少為

殿最其宿衛要任皆令赴農使軍各自佃即以為廩大

興中三吳大饑後軍將軍應詹上表曰魏武帝用棗祗

韓浩之議廣建屯田又於征伐之中分帶甲之士隨宜

開墾故下不甚勞大功尅舉間者流人奔東吳東吳今  
儉皆以還返江西良田曠廢未久火耕水耨為功差易  
宜簡流人興復農官功勞報賞皆如魏氏故事一年中  
與百姓二年分稅三年計賦稅以使之公私兼濟則倉  
庾盈億可計日而待之穆帝升平初荀羨為北部都尉  
鎮下邳今臨淮  
郡縣屯田於東陽之石鼈亦在今臨  
淮郡界也公私利  
之○齊高帝勅桓崇祖修理芍陂田曰卿但努力營田  
自然平殄虜寇昔魏置典農而中都足食晉開汝潁而

河汴委儲卿宜勉之○後魏文帝大統十一年大旱十二年祕書丞李彪上表請別立農官取州郡戶十分之一為屯田人相水陸之宜料頃畝之數以贖贖雜物市牛料給令其肆力一夫之田歲責六十斛甄其正課并征戍雜役行此二事數年之中則穀積而人足矣帝覽而善之尋施行焉自此公私豐贍雖有水旱不為害也○北齊廢帝乾明中尚書左丞蘇珍芝又議修石鼃等屯歲收數十萬石自是淮南軍防糧足孝昭帝皇建中

平州刺史嵇晔建議開幽州督亢舊陂

今范陽郡  
范陽縣界

長城

左右營屯歲收稻粟數十萬石比境得以周贍又於河  
內置懷義等屯以給河南之費自是稍止轉輸之勞武  
成帝河清三年詔緣邊城守堪墾食者營屯田置都子  
使以統之一子使當田五十頃歲終課其所入以論褒  
貶○隋文帝開皇三年突厥犯塞吐谷渾寇邊轉輸勞  
弊乃令朔方總管趙仲卿於長城以北大興屯田○大  
唐開元二十五年令諸屯隸司農寺者每三十頃以下

二十頃以上為一屯隸州鎮諸軍者每五十頃為一屯應置者皆從尚書省處分其舊屯重置者一依承前封疆為定新置者並取荒閒無籍廣占之地其屯雖料五十頃易田之處各依鄉原量事加數其屯官取勲官五品以上及武散官并前資邊州縣府鎮戍八品以上文武官內簡堪者充據所收斛斗等級為功優諸屯田應用牛之處山原川澤土有硬軟至於耕墾用力不同土軟處每一頃五十畝配牛一頭彊硬處一頃二十畝配



牛一頭即當屯之內有硬有軟亦準此法其稻田每八十畝配牛一頭諸營田若五十頃外更有地剩配丁牛者所收斛斗皆準頃畝折除其大麥蕎麥乾蘿蔔等准粟計折斛斗以定等級天寶八年天下屯收者百九十一萬三千九百六十石關內五十六萬三千八百一十石河北四十萬三千二百八十石河東二十四萬五千八百八十石河西二十六萬八十八石隴右四十四萬

九百二石

後上元中於楚州古射陽湖置洪澤屯  
壽州置芍陂屯厥田沃壤大獲其利

通典卷二

# 欽定四庫全書

史部  
通典卷三至七

詳校官侍郎<sub>臣</sub>李封

編修<sub>臣</sub>程嘉謨覆勘

覆校官助教<sub>臣</sub>吳省蘭

校對官中書<sub>臣</sub>田尹衡

謄錄舉人<sub>臣</sub>劉圖南

謄錄舉人<sub>臣</sub>陳賓

欽定四庫全書

通典卷三

唐 京兆杜佑君卿纂

食貨三

鄉黨土斷 版籍並附○上古 周 晉 宋  
齊 梁 陳 後魏 北齊 隋 大唐

昔黃帝始經土設井以塞爭端立步制畝以防不足使  
八家為井井開四道而分八宅鑿井於中一則不洩地  
氣二則無費一家三則同風俗四則齊巧拙五則通財

貨六則存亡更守七則出入相同八則嫁娶相媒九則  
無有相貸十則疾病相救是以情性可得而親生產可  
得而均均則欺凌之路塞親則鬪訟之心弭既牧之於  
邑故井一為鄰鄰三為朋朋三為里里五為邑邑十為  
都都十為師師十為州州夫始分之於井則地著計之於  
州則數詳迄乎夏殷不易其制○周制大司徒令五家  
為比使之相保五比為閭使之相受四閭為族使之相  
葬五族為黨使之相救五黨為州使之相賙五州為鄉

使之相賓

鄭玄曰此所以勸民者也使之者皆謂立其長而教令使之保猶任也救救凶災也賓賓

客其賢者也受者宅舍有故相受寄託也調者謂禮物不備相給足也閭二十五家族百家黨五百家州二千五百家鄉萬二千五百

家此總謂郊內者也

及三年則大比大比則受邦國

之比要

大比謂使天下更簡閱人數及其財物也受邦國之比要則亦受鄉遂矣鄭司農云五家為比

故以比為名今時八月按比是也要謂其簿

遂人掌邦之野

郊外曰野此野謂甸稍縣都

以土地之圖經田野造縣鄙形體之法五家為鄰五鄰

為里四里為鄴

作管反

五鄴為鄙五鄙為縣五縣為遂皆

有地域溝樹之使各掌其政令刑禁以歲時稽其人民

而授之田野簡其兵器教之稼穡

經形體皆謂制分界也鄰里鄴鄆縣遂猶

郊內比閭族黨州鄉也鄭司農云田野之居其比伍之名與國中異制故五家為鄰鄭玄謂異其名者示相變

耳遂之軍旅追胥起徒役如六鄉

里有序而鄉有庠序以明教庠則行

禮而視化焉

夫均其厚薄則生產平統之於鄙則其數舉家於鄉遂則其戶可詳五人為伍則人

之衆寡可知故管子曰欲理其國者必先知其人欲知其人者必知其地自昭穆之後王室中衰井田廢壞不足以紀人之衆寡宣王是以

○齊桓公用管仲管仲曰

料人於太原由茲道失之

夫善牧者非以城郭也輔之以什司之以伍伍無非其里什無非其家故奔亡者無所匿遷徙者無所容不求

而得不召而來故人無流亡之意吏無備追之憂故主  
政可行於人人心可繫於主是以制國郊內則以五家  
為軌軌十為里里四為連連十為鄉鄉五為帥國內十  
五鄉自五至帥郊外則三十家為邑邑十為卒卒十為  
鄉鄉三為縣縣十為屬屬有五自五至屬各有官長以  
司其事寓軍政焉而齊遂霸○徐偉長中論曰夫治平  
在庶功興庶功興在事役均事役均在民數周民數周  
為國之本也先王周知其萬民衆寡之數乃分九職焉



九職既分則勛勞者可見勤惰者可聞也然而事役不均者未之有也事役既均故上盡其心而人竭其力然而庶功不興者未之有也庶功既興故國家殷富大小不匱百姓休和下無怨疾焉然而治不平者未之有也故泉有源治有本道者審本而已矣故周禮孟冬司寇獻民數於王王拜受之登於天府內史司會冢宰貳之其重之也如是今之為政者未之知卹已也辟猶無田而欲樹藝雖有農夫安能措其強力乎是以先王制六

鄉六遂之法所以維持其民而為之綱目也使其鄰比  
相保受賞罰相延及故出入存亡臧否逆順可得而知  
也及亂君之為政也戶口漏於國版夫家脫於聯伍避  
役逋逃者有之於是姦心競生而偽端並作小則濫竊  
大則攻劫嚴刑峻令不能救也人數者庶事之所自出  
也莫不取正焉以分田里以令貢賦以造器用以制祿  
食以起田役以作軍旅國以建典家以立度五禮用修  
九刑用措其唯審人數乎○東晉哀帝崇和元年三月

庚戌天下所在土斷孝武時范甯陳時政曰昔中原喪亂流寓江左庶有旋反之期故許其挾注本郡自爾漸久人安其業邱壠墳柏皆以成行無本邦之名而有安土之實今宜正其封疆土斷人戶明考課之科修閭伍之法難者必曰人各有桑土之懷下役之慮斯誠并兼之所執而非通理之篤論也古者失地之君猶臣所寓之主列國之臣亦有違適之理隨會仕秦致稱春秋樂毅逭燕見襄良史且今普天之人原其氏出皆隨代移

遷何至於今而獨不可帝善之安帝義熙九年宋公劉裕緣人居土上表曰臣聞先王制理九土攸序分境畫野各安其居故井田之制三代以崇秦革其政漢遂不改富強兼并於是為弊在漢西京大遷田景之族以實關中即以三輔為鄉閭不復係之於齊楚九服不擾所託成舊自永嘉播越爰託淮海朝運匡復之算人懷思本之心經略之圖日不暇給是以寧人綏理猶有未遑及至大司馬桓溫以人無定本傷理為深庚戌土斷以

一其業於時財阜國豐實由於此自茲迄今彌歷年載  
畫一之制漸用頽弛雜居流寓閭伍不修王化所以未  
純人瘼所以猶在自非改調無以濟理夫人情滯常難  
與慮始謂父母之邦以為桑梓者誠以生焉敬愛所託  
請依庚戌土斷之科庶存其本稍與事著然後率之以  
仁義鼓之以威聲超大江而跨黃河撫九州而復舊土  
則戀本之志乃速申於當年在始暫勤要終必易於是  
依界土斷唯徐兗青三州人居晉陵者不在斷限諸流

寓郡縣多被併省○宋孝武大明中王玄謨請土斷雍

州諸僑郡縣

今襄陽漢東等郡也

○齊高帝建元二年詔朝臣曰

黃籍人之大紀國之理端自頃氓偽已久乃至竊注爵位盜易年月或戶存而文書已絕或人在而反記死版停私而云隸役身強而稱六疾皆政之巨蠹教之深疵比年雖却改籍書終無得實若約之以刑則人偽已遠若綏之以德又未易可懲諸賢並深明理體各獻嘉謀以何科算能革斯弊也虞玩之上表曰宋元嘉二十七

年八條取人孝建元年書籍衆巧之所始也元嘉中故  
光祿大夫傅崇年出七十猶手自書籍躬加隱校崇何  
必有石建之慎高柔之勤蓋以時屬休明服道修身故  
耳古之共理天下唯良二千石今欲求理正其在勤明  
令長凡受籍縣不加檢勘但封送州州檢得知方却歸  
縣吏貪其賂人肆其奸奸彌深而却彌多賂逾厚而答  
逾緩自泰始三年至元徽四年揚州等九郡黃籍共却  
七萬一千餘戶於今十一年矣而所正者猶未四萬神

州奧區尚或如此江湘諸郡倍不可念愚謂宜以元嘉  
二十七年籍為正人情法既久今建元二年書籍宜更  
立明科一聽首悔迷而不返依制必戮使官長審自檢  
校切令明洗然後上州永以為正若有虛昧州縣同咎  
今戶口多少不減元嘉而版籍頓闕弊亦有以自孝建  
以來入勲者衆其中操干戈衛社稷者三分殆無一焉  
尋蘇峻平後庾亮就溫嶠求勲簿而嶠不與以為陶侃  
所上多非實錄物之懷私無代不有宋末落紐此巧尤



多又有改注籍狀詐入仕流昔為人役者今反役人又  
生不長髮便謂為道人或抱子并居竟不編戶遷徙去  
來公違土斷屬役無漏流亡不歸法令必行自然競反  
為理不患無制患在不行不患不行患在不久帝省表  
納之乃別置校籍官置令史限人一日得數巧以防懈  
怠至武帝永明八年謫巧者戍緣淮各十年百姓怨咨  
帝乃詔曰既往之憊不足追咎自宋昇明以前皆聽復  
注其有謫役邊疆各許還本自此後有犯嚴加其罰○

梁武帝時所司奏南徐江郢逋兩年黃籍不上尚書令  
沈約上言曰晉咸和初蘇峻作亂版籍焚燒此後起咸  
和三年以至於宋並皆詳實朱筆隱注紙連悉縫而尚  
書上省庫籍唯有宋元嘉中以來以為宜檢之日即事  
所須故也晉代舊籍並在下省左人曹謂之晉籍自東  
西二庫既不係尋檢主者不復經懷狗牽鼠齧雨濕沾  
爛解散於地又無扃滕此籍精詳實宜保惜位高官卑  
皆可依按宋元嘉二十七年始以七條徵發既立此科

苟有迴避姦偽互起歲月滋廣以至於齊於是東堂校籍置郎令史以掌之而簿籍於此大壞矣凡粗有衣食者莫不互相因依競行姦貨落除卑注更書新籍通官榮爵隨意高下以新換故不過用一萬許錢昨日卑微今日仕伍凡此姦巧並出愚下不辨年號不識官階或注義熙在寧康之前或以崇安在元興之後此時無此府此年無此國元興唯有三年而猥稱四年又詔書甲子不與長歷相應如此詭謬萬緒千端校籍諸郎亦所

不覺不才令史更何可言且籍字既細難為眼力尋求  
巧偽莫知所在徒費日月未有實驗假令兄弟三人分  
為三籍却一籍父祖官其二初不被却同堂從祖以下  
固自不論諸如此例難可悉數或有應却不却不須  
却而却所却既多理無悉當懷冤抱屈非止百千投辭  
請訴充曹掾府既難領理交興人怨於是悉聽復注普  
停洗却既蒙復注則莫不成官此蓋核籍不精之巨弊  
也臣謂宋齊二代士庶不分雜役減闕職由於此自元

嘉以來籍多假偽景平以前既不係檢凡此諸籍得無巧換今雖遺落所存尚多宜有徵驗可得信實其永初景平籍宜移還上省竊以為晉籍所餘須加寶愛若不切心留意則還復散失矣不識胄胤非謂衣冠凡諸此流罕知其祖假稱高曾莫非巧偽質諸文籍姦事立露懲覆矯詐為益實弘又上省籍庫雖直郎題掌而盡日料校唯令史獨入籍既重寶不可專委羣細若入庫檢籍之時直郎直都應共監視寫籍皆於郎都目前並加

掌置私寫私換可以永絕事畢郎出仍自題名臣又以  
為巧偽既多並稱人士百役不及高卧私門致令公私  
闕乏是事不舉宜選史傳學士諳究流品者為左人郎  
左人尚書專共校勘所貴卑姓雜譜以晉籍及宋永初  
景平籍在下省者對共讐校若譜注通籍有卑雜則條  
其巧謬下在所科罰帝以是留意譜籍詔御史中丞王  
僧孺改定百家譜由是有令史書吏之職譜局因此而  
置始晉太元中員外散騎侍郎賈弼好簿狀大披羣族

所撰十八州百一十六郡合七百一十二卷士庶畧無遺闕其子孫代傳其業宋王弘劉湛並好其書弘日對千客而不犯一人諱湛為選曹始撰百家譜以助銓序傷於寡畧齊王儉復加得繁省之衷僧孺為八十卷東南諸族別為一部不在百家之數○陳文帝天嘉初詔曰自頃編戶播遷良可哀愴其亡鄉失土逐食流移者今年內隨其適樂來歲不問僑舊悉令著籍同土斷之例○後魏初不立三長唯立宗主督護所以人多隱冒

五十三十家方為一户謂之蔭附蔭附者皆無官役豪強徵斂倍於公賦矣孝文太和十年給事中李冲以三正理人所由來遠於是初三長之制曰宜准古五家立一鄰長五鄰立一里長五里立一黨長黨長取鄉人強謹者鄰長復一夫里長二黨長三所取復征戍餘若人三長三載亡愆則陟用之一等太后覽而稱善引見公卿議之中書令鄭義祕書令高祐等曰冲求立三長者乃欲混天下為一法言似可用事實難行太尉元丕曰



臣謂此法若行公私有益方今有事之月校比人戶新舊未分人心勞怨請過今秋至冬閒月徐乃遣使於事為宜冲曰人可使由之不可使知之若不因調時百姓徒知立長校戶之勤未見均徭省賦之益心必生怨宜及課調之月令知賦稅之均既識其事又得其利因人之欲為之易行著作郎傅思益進曰人俗既異險易不同九品差調為日已久一朝改法恐成擾亂太后曰立三長則課有常準賦有恒分苞蔭之戶可出僥倖之人

可止何為而不可遂立三長公私便之○北齊令人居  
十家為鄰比五十家為閭百家為族黨一黨之內則有  
黨族一人副黨一人閭正二人鄰長十人合有十四人  
共領百家而已至於城邑一坊僑舊或有千戶以上唯  
有里正二人里吏二人里吏不常置隅老四人非是官  
府私充事力坊事亦得取濟若論外黨便是煩多時宋  
孝王撰關東風俗傳曰昔六國之亡豪族處處而有秦  
氏失馭競起為亂及漢高徙諸大姓齊田楚景之輩以

實關中蓋所以強本弱末之計也文宣之代政令嚴猛  
羊豕諸豪頗被徙逐至若瀛冀諸劉清河張宋并州王  
氏濮陽侯族諸如此輩一宗近將萬室煙火連接比屋  
而居獻武初在冀郡大族蝟起應之侯景之反河南侯  
氏幾為大患有同劉元海石勒之衆也凡種類不同心  
意亦異若遇間隙先為亂階時宋世良獻書以為魏氏  
十姓八氏三十六姓皆非齊代腹心請令散配郡國無  
士族之處給地與人一則令其就彼仕宦全其門戶二

則分其氣勢使無異圖文宣不納數年之後乃濫戮諸  
元與其酷暴誅夷未若防其萌漸分隸諸郡○隋文帝  
受禪頒新令五家為保保五為閭閭四為族皆有正畿  
外置里正比閭正黨長比族正以相檢察蘇威奏置五  
百家鄉正令理人間詞訟李德林以為本廢鄉官判事  
為其里閭親識剖斷不平令令鄉正專理五百家恐為  
害更甚且今時吏部總選人物天下不過數百縣於六  
七百萬戶內銓簡數百縣令猶不能稱才廼欲一鄉之

內選一人能理五百家者必恐難得又即要荒小縣有  
不至五百家者復不可令兩縣共管一鄉勅內外羣官  
就東宮會議自皇太子以下多從德林議蘓威又言廢  
郡德林語之云修令時公何不論廢郡為便令纔出其  
可改乎然高頴同威之議遂置之十年虞慶則於關東  
諸道巡省使還並奏云五百家鄉正專理詞訟不便於  
人黨與愛憎公行貨賄乃廢之○大唐令諸戶以百戶  
為里五里為鄉四家為鄰三家為保每里置正一人若  
山

谷阻險地遠人稀之處聽隨便量置掌按比戶口課植農桑檢察非違催

驅賦役在邑居者為坊別置正一人掌坊門管鑰督察  
姦非並免其課役在田野者為村別置村正一人其村  
滿百家增置一人掌同坊正其村居如滿十家者隸入  
大村不須別置村正天下戶為九等三年一造戶籍凡  
三本一留縣一送州一送戶部常留三比在州縣五比  
送省儀鳳二年二月勅自今以後省黃籍及州縣籍也諸里正縣司選勳官六  
品以下白丁清平強幹者充其次為坊正若當里無人

聽於比鄰里簡用其村正取白丁充無人處里正等並  
通取十八以上中男殘疾等充

通典卷三